

Gipuzkoako Aldizkari Ofiziala

24. zenbakia**Data 2011-02-07****194 orria**

7 Udal Administrazioa

LASARTE-ORIAKO UDALA

Herritarren elkarbizitza eta bide publikoaren erabilera eta garbiketa arautzen duen ordenantzaren behin-betiko onarpena

LASARTE-ORIAKO UDALA

Iragarkia

Herritarren Elkarbizitza eta bide publikoaren erabilera eta garbiketa arautzeko Udal-Ordenantza behin-betiko onetsia izan ondoren, Probintziako aldizkari Ofizialean testu osoa argitaratzen da, Errigemena Lokaleako Oinarririk arautzen dituen Legeko 70.2 artikulua agintzen duena betez, eta apirilaren 2ko 7/1985 Legeko 65.2 artikuluan aurrikusutako epea iragandakoan sartu da indarrean.

Lasarte-Oria, 2011ko urtarrilaren 28a.—Alkatea. (1165)

Herritarren elkarbizitza eta bide publikoaren erabilera eta garbiketa arautzeko udal-ordenantza.

Ordenantzaren helburu nagusiak izan behar du espazio publikoa elkarbizitzako eta gizalegezko toki bat izan dadila segurtatzea, eta espazio horretan pertsona guztiek askatasunez egin ahal izan ditzatela beren zirkulazio libreko, aisiako, elkarteko eta jostaketako jarduerak, osoki errespetatuz lagun hurkoen duintasuna eta eskubideak, bai eta Lasarte-Orian aurkitzen diren bizimolde eta adierazpen mota guztiak ere. Ordenantzak tresna eraginkorra izan behar du, elkarbizitzari eragin diezaioketen egoera eta gorabehera berriei aurre egiteko. Egoera eta gorabehera berriei erantzun demokratikoa eta orekatua emateko asmoa du, horretarako oinarritzat hartuz, batetik, espazio publikoetan guztiek libreki portatzeko eta beren askatasunean errespetatuak izateko duten eskubidea aitortzea; baina baita ere, bestetik, guztiok onartu behar ditugula bizikidetzazko betebeharrak jakin batzuk, gainerakoei aitortutako askatasuna, duintasuna eta eskubideak errespetatzekoak eta, halaber, espazio publikoa egoera egokian mantentzekoak. Eta hori guztia, gainera, jakitun izanik helburu horiek lortzeko ez dela nahikoa udaleko agintaritzak duen santzio-ahalmena baliaraztea, nahiz kasu batzuetan hori ere ezinbestekoa izan, baizik eta premiazkoa dela, era berean, beharrezkoak diren sustapeneko eta prestazio sozialeko jarduerak garatzea Udalak hirian, bai elkarbizitzaren eta gizalegearen balioak bultzatzeko, bai horren beharra izan dezaketen pertsonak modu egokian atenditzeko. Alde horretatik, bada, eta beste modu batera ezin izan litekeen bezala, Udalak berak izan behar du lehena Ordenantza betetzen. Udalak elkarbizitza eta gizalegea sustatzeko beharrezkoak diren politikak eramango ditu aurrera, udalerrian dauden pertsonen jokabideak eta jarrerak elkarbizitzaren gutxienezko estandarretara egokitzea lortzeko xedearekin, helburutzat izanik espazio publikoan gizalegea bermatzea eta, ondorioz, bizi-kalitatea hobetzea.

I. KAPITULUA

XEDAPEN OROKORRAK

1. artikulua. Xedea.

Ordenantza honen funtsezko xedea komunitatean elkarrekin bizitzeko arauak ezartzea eta arau horiek bete daitezen zaintzea da, horrela bakean, askatasunean eta eskubideen nahiz betebeharren berdintasunean garatzea lortzeko.

Helburu hori lortzeko, Ordenantza honek elkartasunean eta elkarrekiko errespetuan oinarritutako herritarren talde bizitza arautzeko xedapenak ematen ditu.

2. artikulua. Aplikazio-eremua.

Ordenantza hau Lasarte-Oriako udal-barruti osoan aplikatzekoa da, eta betetzera obligatuak geratuko dira bertako

herritar zein bisitari guztiak.

3. artikulua.

Ordenantza honen xedapenak ez betetzea gertatuz gero, Ordenantzaren edukia ez jakiteak ez dio mesederik egingo zertzelada horretan babesten den inori.

II. KAPITULUA

JOKABIDE ZIBIKOAZ

4. artikulua. Herriko altzariak eta espazio publikoak babestea.

1. Herritar guztien betebeharra da udalerrian dauden altzari publikoak behar bezala erabiltzea, eta normal kontserbatzea eta erabiltzea eragotziko dien andeatzerik ez nozitzeko moduan errespetatu eta erabili beharko dituzte.
 2. Galarazita daude herriko altzariak eta espazio publikoak zikintzen eta hondatzen dituzten edo honda ditzaketen ekintzak eta, bereziki, honako egintza hauek:
 - a) Bankuak beren erabilera naturalaren kontrako eran erabiltzea; hala, ezin dira ez oinpean erabili, ez kokatuak dauden lekuetatik erauzi, ez hautsi, ez zikindu, ez eta, oro har, haien erabilerari kalte egin dion edo kontserbazioa hondatzen dion ezer egin ere.
 - b) Jolas-tresnak behar ez bezala eta kalte egiteko edo hondatzeko moduan erabiltzea, bai halaber haurrentzako jolas-tresnak helduek erabiltzea edo jolaserako adierazitakoa baino gehiagoko adina dutenek erabiltzea.
 - c) Zakarrak, pipitak, fruitu lehorren edo antzekoen azalak, txikleak, bilgarriak edo paperak horretarako jarrita dauden paperontzietatik kanpo botatzea.
 - d) Paperontziak iraultzea edo erauztea, bai halaber haien itxura eta osotasuna honda dezaketen bestelako ekintzak egitea.
 - e) Paperontzietan, kontainerretan eta hondakin urbanoetarako diren bide publikoko espazioetan tresna edo objektu arriskutsuak edo kaltegarriak botatzea.
- Ondorio horietarako, tresna edo objektu arriskutsuztat edo kaltegarritzat hartuko dira pertsoneri, haien osasunari, osotasun fisikoari edo ingurumenari kalte egin diezaieketen guztiak, hala nola animaliak eta animalia-hondarrak, substantzia estupezazientek kontsumitzeko xiringak eta tresnak, zerbitzu sanitarioetan erabiltzen diren eta gaixotasunak kutsa edo zabal ditzaketen materialak, bai halaber era guztietako droga toxikoak, estupezazientek eta produktu kimikoak, erradiaktiboak, piroteknikoak, leherkariak eta su-eragileak, pilak eta bateriak, tresna elektrikoak eta elektronikoak, pintura-ontziak edo aerosolak, bonbillak edo fluoreszenteak.
- f) Iturri publikoetako hodiak, kanilak eta gainerako elementuak manipulatzeko haien funtzionamendu normalari berez ez dagokion eran.
 - g) Udalerrian dauden farolei, eskulturei eta gainerako apaingarriei kalte egiten dien edozein ekintza edo manipulazio, bai eta elementu horiek hondatzen dituen edozein ekintza ere.
 - h) Sua eta jarduera piroteknikoak egitea udalaren eta alor horretan eskumena duten administrazioen nahitaezko baimenik gabe. San Joan bezperako suak eta antzekoak egiteko, udalaren baimena lortu beharko da, komunikaturiko egintzaren bitartez.
 - i) Bide publikoan dauden eta gizakien kontsumorako diren iturrietatik animaliei zuzenean edaten uztea.
 - j) Iturri, ibai, erreka edo urmaeletan edo bide publikoan botatzea usain txarrak sorrarazten dituen, toxikoa den eta/edo oro har gogaikarri gertatzen den edozein substantzia.

5. artikulua. Debeku espezifikokoak.

Era berean, galarazita dago:

1. Bide publikoan petardoak edo bengalak saltzea nahiz erabiltzea, eta edozein motatako objektuak jaurtikitzen dituzten tresna edo gailuak erabiltzea; esate baterako, arkuak, zerbatanak, tiragomak eta bolak botatzeko pistolak.
2. Ordena publikoa asalda dezaketen borrokak, irainak, trufak, nahitako gogaitarazteak, etab.
3. Oinezkoentzako plazetan eta espaloietan motozikletaz, ziklomotorrez, patin motordunetan edo beste edozein ibilgailu edo tramankulu motordunetan ibiltzea.

Debeku bera dute bizikletek, salbu eta haurrek gidatzen badituzte eta abaila txikian badoaz.

Oinezko bihurturiko bideetan ere zirkulatzen ahalko da bizikletaz, betiere oinezkoei eragozpenik eragin gabe.

Hori guztia alde batera utzirik Udalak bidezidor, bidegorri edo erabilera publikoko beste espazio jakin batzuei buruz eman ditzakeen xedapen espezifikoak.

4. Jardinerak, loreontziak, etab. jartzea baldin eta fatxadetatik aurrera ateratzen badira edo eraikinaren beraren elementuek behar bezala eusten ez badiete eta, hortaz, bide publikoko oinezkoak eta haien ondasunak arriskuan jartzen badituzte.
5. Patioetan, galerietan, merkataritzako lokaletan, garajeetan, balkoietan edo bestelako espazio ireki edo itxietan ezingo da animaliarik utzi baldin eta beren soinu, oihu edo kantuekin, edo beren eginkariak eginez, auzokoei gogait eragiten badiete.
6. Ez da onartzen bide publikoan animalientzako janaria uztea.

6. artikulua. Parke eta lorategi publikoak.

1. Herritarren betebeharra da udalerriko parke, urmael eta lorategi publikoak errespetatzea.
2. Bide publikoan dauden parke, lorategi, landare-ontzi, parterre eta eremu landatuetako landare-espezie guztiak (zuhaitzak, zuhaixkak, belarkiak eta garaiko landareak) ongi kontserbatze eta mantentzea aldera, galarazita daude honako ekintza hauek:
 - a) Landareak ostea (zuhaitzak, zuhaixkak, belarkiak eta garaiko landareak).
 - b) Soropila eta eremu landatuak hondatzea edo bertan kanpatzea.
 - c) Zuhaitz eta zuhaixken mozketa, inausketa, hausketa eta abarren bidez haiei kalteak eragitea edo haietara igotzea.
 - d) Haien azaletan grabatzea edo pintatzea, puntak iltzatzea, haiei eskailerak, lanabesak edo aldamioren euskarriak lotzea eta kartelak jartzea. Debekatua dago, halaber, konpainiako animaliei zuhaitzak hausten uztea.
 - e) Aldi baterako bada ere, edozein zuhaitzen gainean eta lorategietan obrako materialak pilatzea edo haietan edozein motatako produktu toxikoak isurtzea. Berdeguneetan materialak pilatu (aldamiaoa muntatu) behar izanez gero, baimena eskatu beharko da eta, ondoren, gunea lehen zegoen bezala utzi.
 - f) Berdeguneetan, haiek hondatzeko edo duten estetika eta erabilera ona kaltetzeko moduko zaborrak, hondakinak, harriak, legarra edo beste edozein produktu botatzea.
 - g) Soropil eta lorategietan gorotzak uztea.
 - h) Parke eta lorategietan sua piztea edo su-metak egitea.
 - i) Matrikulatu gabeko bizikleta, motozikleta edo ziklomotorrekin zirkulatzea horretarako egokitu gabe dauden zonetatik kanpo.
 - j) Parke eta lorategien barruan etxeke animaliak aske uztea horretarako egokitu gabe dauden guneeetan.

7. artikulua. Edari alkoholduen kontsumoa.

Bide publikoan edari alkoholodunak kontsumitzeari dagokionez, galarazita dago:

- a) Bide publikoan edari alkoholodunak saltzea nahiz kontsumitzea, horretarako udal-lizentzia duten terrazetan edo kanpoko mahaitxoetan izan ezean.
- b) Ostalaritzako establezimenduetan edariak saltzea edo hornitzea kanpoan kontsumitzeko, ez bada horretarako udal-baimena duten terrazetan edo beste instalazio batzuetan kontsumitzeko.
- c) 18 urtetik beherakoei edari alkoholodunak hornitzea, saltzea eta kontsumitzea, salmentako lekuetan bezala kontsumoko lekuetan ere.

Adingabeei edari alkoholodunak hornitzearen erantzule izango dira, halaber, adindunak izanik eta establezimendu eta komertzioetako arduradunen kontroletik ihes egiteko xedez, edari alkoholodunak pertsonalki erosten dituzten eta gero adingabeei ematen dizkieten hirugarren pertsonak.

Segurtasuneko arrazoiengatik, jendetza handia biltzen duten ikuskizunetan eta izaera bereziko ekitaldietan, hala nola herriko jaietan, inauterietan eta Eguberrietako ospakizunetan, bai eta bestelako ekitaldi jendetsuetan ere, hala nola kontzertuetan eta antzekoetan, Udalaren baimena baldin badute eta edari alkoholodunak saltzeko aukera baimendua badute, berriz erabiltzeko edalontzi plastikozkoetan zerbitzatuko dituzte, eta ez da inolaz ere onartuko kristalezko, beirazko edo antzeko ontzirik.

III. KAPITULUA

BIDE PUBLIKOAREN GARBIKETA

8. artikulua.

Herritar guztien betebeharra da garbi mantentzea udalerria oro har eta hango espazio publikoak bereziki.

9. artikulua.

1. Loreontziak edo landareak bide publikora urik isuri gabe ureztatuko dira, eta, isurtze hori saihestearren, soberako ura jasotzeko ontzia ipiniko da.
2. Alfonbrak, erratzak edo zapiak astintzea, bide publikora edo jendea joan-etorrian ibiltzen den barruko patioetara ematen duten balkoi, begiratoki edo leihoetan, gaueko 21:00etatik goizeko 09:00ak arte soilik egiten ahalko da. Lan horiek kalterik eta eragozpenik ez sortzeko moduan egingo dira.

10. artikulua.

Galarazita dago bide publikoa zikin dezakeen edozein operazio egitea, eta bereziki debekatua dago:

- a) Bide publikoan ibilgailuak urez garbitzea.
- b) Motorrari olioia aldatzea edo bide publikoa zikin dezakeen edozein likido mota manipulatzeko.
- c) Bide publikoan ibilgailuak konpontzea.
- d) Bide publikoan eginkariak egitea, gernua egitea eta txistua botatzea.
- e) Zaborrak edo hondakin urbanoak manipulatzeko eta, ondorioz, haiek barreiatzea, haien bilketa oztopatzea edo haien bilgarriak aldatzea.
- f) Bide publikora txikleak, zigarrokinak, paperak, zaborrak, hondakinak eta antzekoak botatzea edo bertan uztea.
- g) Zakurren gorotzak bide publikoetan, haurrentzako parkeetan eta, oro har, pertsonak ibiltzeko edo egoteko den edozein lekutan uztea.
- h) Bide publikoan botilak, botilatxoak, edalontziak, edari-potoak, poltsak eta bilgarriak jaurtitzea edo uztea.

11. artikulua.

Baldin eta industriako edo merkataritzako jarduera batek bere inguruetan zikinkeria sortzen badu, jardueraren titularrak garbi eduki beharko du bide publikoaren parte afektatua, nahitaezko lizentziei aplikatzekoa zaien erregimenetik datozkeen neurri zuzentzaileak eta gainerako betebeharrak alde batera utzirik.

12. artikulua.

Erakusleiho, establezimendu, salmenta-puntu eta antzekoen garbiketa kontu handiz egingo da, bide publikoa ez zikintzeko moduan; eta oinezkoei eragozpenik sortzen ez dieten orduetan egingo da.

13. artikulua. Toldoak eta pertsianak.

Toldoak eta pertsianak Arau Subsidiarioen Ordenantzetan xedatutakoak arautzen ditu.

Beheko solairuko lokalen eta etxebizitzan toldoak eta pertsianak kontserbazioko eta garbitasuneko egoera onean mantendu beharko dira, eta berriak jarriko dira haien kanpoko itxurak edo andeatze-egoerak hala eskatzen duenean.

14. artikulua. Errotuluak, plakak eta gainerako bereizgarriak.

Edozein errotulu, plaka edo bereizgarri bide publiko aldera jartzeko, udaleko lizentzia eduki beharko da, eta Arau Subsidiarioetako 4.30 artikuluan xedatutakoa beteko beharko da.

Horiek garbi eduki beharko dira, eta hondaturikoak berriekin ordeztu beharko dira.

15. artikulua.

Jeneroa soltean edo edozein materia ontziratu gabe garraiatzen duten ibilgailuek bide publikora ezin isurtzeko moduan kargatuak eta ekipatuak joan behar dute.

16. artikulua. Karga eta deskarga.

1. Edozein ibilgailu kargatzeko eta deskargatzeko lanen kasuan, espaloirik edo galtzadarik zikindu bada, berehala garbituko dira, lan horiek amaitu bezain laster.

2. Garbiketa hori egiteko obligazioa dute ibilgailuen txoferrek, jabeek eta, subsidiarioki, karga edo deskarga destinatua doakien establezimendu edo finken titularrek.

Arau orokor gisa, baldin eta zuzenean edo subsidiarioki obligatua daudenek dagokien garbiketa egiten ez badute, udal-zerbitzuek egingo dute, baina kostuak haiei ordainaraziko zaizkie.

17. artikulua. Erabilera berezi edo pribatiboak afektaturiko zonen garbiketa.

1. Erabilera arrunt bereziaren eta pribatiboaren ondorioz bide publikoa zikintzen bada, erabilera horien baimena edo kontzesioa duten pertsona fisiko edo juridikoen erantzukizuna izango da. Sortzen dituzten hondakinak botatzeko eta atxikitzeko ontzi homologatuak jartzeko eskatzen ahalko die Udalak, eta ontzi horiek garbitu ere egin beharko dituzte.

2. Terraza eta mahaien garbiketari dagokionez, titularrek betiere ordubeteko epean egin beharko dute, establezimendua ixten denetik aurrera kontatuta. Nolanahi ere, egun osoan eduki beharko dute garbitasuneko eta higieneko kondizio egokietan, aldian behin erratza pasatuz eta garbiketak eginez.

3. Terrazetako jarduera hondakinik ez sortzeko moduan egingo da.

18. artikulua.

Finka eta eraikinen jabeek elementu horien apaindura publikoa kontserbatzeko betebeharra dute. Horretarako, fatxa-

den, sarreren eta, oro har, eraikinak dituen eta bide publikotik ikus daitezkeen parte guztien garbiketa eta mantentzia egin beharko dute, bai halaber eraikinen osagarriena, hala nola antenak, tximiniak.

IV. KAPITULUA

OBRAK GAUZATZEA

19. artikulua.

1. Egiten diren jarduera eta obra guztiek ezartzen diote haien titularrari, bide publikoa zikin ez dadin, neurriak hartzeko betebeharra, nahitaezko lizentzietatik datozen betebeharrak alde batera utzirik, bai halaber lan horrek afektaturiko partea behar adina aldiz garbitzeko eta sorturiko material-hondarrak erretiratzeko betebeharra.
2. Udalak errekeritzen ahalko dio arduradunari dagozkion garbiketak egiteko.
3. Eraikitzeko, zaharberritzeko, eraberritzeko edo eraisteko lanak direnean, obraren lizentziaren titularra izango da obra horiek afektaturiko bide publikoa garbitzearen erantzulea.

20. artikulua. Obraren babesak.

1. Zikinkeria prebenitzeko, bide publikoa afektatzen duten edo afekta dezaketen lanak edo obrak egiten dituzten pertsonak bide publikoa babestu egin beharko dute, haren inguruan elementu egokiak jarrita, hartara obrako lur eta material soberakoak baimendutako eremutik edo obra mugatzen duen perimetrotik kanpora isur eta barreia ez daitezen.
2. Galarazita dago obraren perimetroak mugatua ez daukan bide publikoan lurrak, hondarrak, legarrak eta gainerako materialak uztea, bai halaber eusteko eta induskatzeko elementu mekanikoak eta eraikuntzarako gainerako elementu lagungarriak pilatzea, non eta udalaren baimen espresa ez duen, eta espazio hori betiere garbi eduki beharko da.
3. Lanegun bakoitza bukatzen denean, bide publikoan egindako lanen eremuak, zangak, kanalizazioak, etab. behar bezain garbi eta babestuak utziko dira, eta istripurik ez gertatzeko egokiro seinalizatuak, gaeuz balizatzeako elementuak barne.

21. artikulua. Garbiketako plataforma.

1. Obraren esparruan, plataforma bat eduki beharko da, ibilgailuen gurpilak eta galtzada, espaloiak edo erabilera publikoko beste elementu batzuk zikin ditzaketen gainerako elementuak bertan garbitu ahal izateko modukoa. Ibilgailuak obraren esparrutik kanpora atera baino lehen garbitu beharko dira.
2. Prebentzio hori ez betetzeak berekin ekarriko du, dagokion santzioa jartzeaz gain, Udaltzaingoak obrako ibilgailu horiei bide publikora ateratzea debekatuko diela.
3. Erantzule solidarioak izango dira obraren sustatzailea edo obrako lizentziaren titularra.

22. artikulua. Masaderak.

1. Galarazita dago ibilgailu masaderadunean hormigoia garraiatzea, baldin eta deskargatzeko ahoa itxita ez badarama, hormigoia hori bide publikora isurtzea eragotziko duen dispositibo baten bitartez.
2. Masaderak bide publikoan eta horretarako egokia ez den beste edozein lekutan garbitzea.
3. Aurreko bi atal horiek betetzen ez badira, ibilgailuaren jabea eta gidaria izango dira erantzuleak, eta erantzule subsidiarioa, berriz, obraren sustatzailea edo zerbitzua ematen dioten jardueraren titularra. Isurtzen den hormigoia eta afektaturiko bide publikoa garbitzera obligatuak egongo dira, dagozkien santzioak alde batera utzirik.

23. artikulua. Lurren eta obra-hondakinen garraioa.

1. Lurrak eta obra-hondakinak garraiatzeko erabiltzen diren ibilgailuek beharreko baldintzak beteko dituzte, beren edukia bide publikora isur ez dezaten.
2. Baldin eta istripuaren, iraultzearen edo beste edozein gorabeheraren ondorioz karga bide publikora erortzen edo isurtzen bada, eta horrek bideko segurtasunari begira arriskuak sor baditzake, kasuan kasuko gidariak ahalik eta azkarren eman beharko diote horren berri Udaltzaingoiari, eta, horrekin batera, eroritakoa biltzen eta arrisku-eremutik kanpo eramaten hasiko dira, garbiketako zerbitzuek eman diezaieketen laguntzaren zain. Nolanahi ere, gorabehera horiei inputa dakizkiekeen gastuak ibilgailuen jabeen edo gidarien kontura joango dira.
3. Lurrak eta obra-hondakinak garraiatzen dituztenak behartuak daude, baldin eta bide publikoa zikintzen bada, afektaturiko bide-tartea berehala garbitzera.
4. Isurketen erantzuleak behartuak gelditzen dira baimenik gabeko lekuetara isuritako lurrak eta obra-hondakinak aldiro erretiratzera, eta, horrez gain, dagozkien santzioak jartzen ahalko zaizkie.

Edozein kasutan ere, erantzule solidariotzat jotzen dira zuzeneko egilea, ibilgailuaren jabea eta isurketatik onuraren bat atera lezakeen pertsona oro.

V. KAPITULUA

URBANIZAZIO ETA ORUBEEN GARBIKETAZ

24. artikulua. Espazio pribatuen garbiketa.

1. Jabeen dagokie urbanizazio pribatuetako espaloiak, igarobideak, galtzadak, plazak eta lorategiak garbitzeko lana.
2. Jabeen betebeharra izango da etxadietako barruko patioak, orube partikularrak, merkataritzako galeriak eta antzekoak garbitzea.
3. Elementu pribatu horien guztien garbitasunezko egoera kontrolatzea eta ikuskatzea Udalak egingo du, eta erantzuleei garbitzeko eskatuko die, zeregin horretarako udal-zerbitzuek ematen dituzten aginduen arabera.

25. artikulua. Orubeak eta lursail pribatuak.

1. Orube eta lurren jabeek zabor eta hondakinik gabe eduki beharko dituzte leku horiek, eta beharreko kondizioetan osasunari, higienerari, segurtasunari eta apaindura publikoari dagokienez. Era berean, arratoiez eta intsektuez gabetu beharko dituzte, horretarako baimena duen enpresa baten bidez.
2. Hirigintzako edozein jarduketaren prozesuan diren eraikin hondatuek behar den bezala itxita edo hesituta egon beharko dute, haiekin zerikusirik ez duen edonori bertara libreki sartzea galarazteko.
3. Kapitulu honetako punturen bat betetzen ez bada, Udalak, subsidiarioki eta indarrean dauden legezko mugekin, horretarako egokiak diren neurriak hartuko ditu, eta lur horretara sartzen ahalko da aurreko bi paragrafoetan adierazitako xedeekin. Sortzen diren kostuak, berriz, jabeen inputatuko zaizkie.

VI. KAPITULUA

BIDE PUBLIKOAREN OKUPAZIOA

26. artikulua. Irizpide orokorra.

- a) Galarazita dago kontsumorako produktuak zuzenean bide publikora banatzen dituzten saltzeko makinak jartzea, udalaren beharrezko baimenik ez badute.
- b) Galarazita dago bide publikoa erakusgailuekin edo beste edozein motatako objektu, instalazio edo elementuekin okupatzea, dagokion udal-lizentziarik ez badu.

c) Bide publikoan instalatzen diren haur-jolas elektrikoek beharrezko baimena izan beharko dute, eta baimen horretan finkatzen den ordutegira mugatuko beharko dute funtzionamendua, betiere auzokoak gogaitu gabe.

27. artikulua.

Ordenantza honetan arautuak dauden eta helburu komertziala duten jarduerak garatzeko, beharrezkoa da aldeztatik udalaren lizentzia lortzea.

Galarazita daude publizitatezko jarduera hauek, non eta udalaren baimen berezia ez duten eta aldeztatik eskatzaileak behar adina justifikatzen ez dituen.

- a) Ibilgailuen joan-etorria edo oinezkoen segurtasuna konprometi dezakeen publizitatezko edozein euskarri ipintzea edo instalatzea.
- b) Bide publikoan edozein eratako pintadak edo piktogramak egitea, nahiz dela galtzadan, espaloietan, zintarrarian, plazetan, pasealekuetan, zuhaitzetan, kale-argietan, zutabeetan, eraikinen fatxadetan.
- c) Kola edo antzeko produkturen bat erabiliz eransten den publizitatezko instalazio oro.

28. artikulua. Publizitate komertziala ipintzea eta erretiratzea.

1. Publizitateko kartelak eta paperak ipini aurretik, hori egiteko dagokion baimena eskatu beharko da. Baimen-eskaeran, behar bezala adierazi beharko da zein den eskaera egiten duen entitatea, kartelak non jarri nahi dituen eta zenbat denboran eduki nahi dituen ikusgai.
2. Erakusgai egoteko epea udalaren lizentzian finkatuko da, eta, hala egin ezean, 5 eguneko izango da, salbu eta hauteskundeetako kanpainekin loturikoetan, horiek gehienez ere 21 eguneko iraupena izango baitute.
3. Publizitaterako instalazioak erretiratu egin behar dira erakusgai egoteko gehienezko epea bukatzen denean edo haien balio-aldia bukatzen denean.
4. Baimenaren titularrak arduratu behar du jarritako elementuak kentzeaz eta dena lehen zegoen moduan uzteaz, udal-zerbitzuek esaten diotenaren arabera.
5. Debekatua dago merkataritzako publizitatea dakarten edozein eratako foileto edo paperak edo tankera horretako edozein material bide publikoan eta espazio publikoetan sakabanatzea edo botatzea.

29. artikulua. Kanpatzeak.

1. Lasarte-Oriako udalerrri osoan ezingo da ez kanpatu, ez kanpin-dendetan, ibilgailuetan, horretarako prestaturiko beste edozein bizitegi mugikorretan, txaboletan edo ondasun publikoen gainean bizi, Udalak horretarako baimen espresa eman ezean.
2. Era berean, espazio publikoetan ezingo da janaririk prestatu, eta ez da onartuko inolako surik, su-metarik edo barbakoarik egitea, horrek berekin dakarren arriskuagatik, salbu eta beharrezkoa duten jardueretarako, betiere aldeztatik udalak baimenduta.

30. artikulua.

Eraikinak, orubeak, merkataritzako lokalak eta bestelakoak zelaitzeko, eraikitzeko, konpontzeko edo hobetzeko obrak egiten dituztenek galarazia dute bide publikoa okupatzea, aldi baterako bada ere, non eta aldeztatik ez duten lortzen horretarako behar den udalaren lizentzia edo baimena.

31. artikulua.

Galarazita dago bide publikoan edozein objektu uztea edo pilatzea, udalaren baimenen espresa izan ezean edo etxeko trasteak eta tamaina handikoak biltzeko Alkatetzako dekretu bidez espresuki ezarrita dauden egunetan izan ezik, eta udal-zerbitzuek erretiratzeko xedez baizik ez. Bide publikoan baimenik gabe edo baimendutakoez beste egun batzuetan pilaturiko edozein objektu udal-zerbitzuek erretiratzen ahalko dute, eta behar ez den eran utzitako

materialaren titularrari ordainaraziko dizkio Udalak horren kostuak.

VII. KAPITULUA

IBILGAILU ABANDONATUAK

32. artikulua. Abandonuzko egoera.

1. Galarazita dago erabiltzeari utzitako ibilgailuak bide publikoan abandonatzea. Jabeen erantzukizuna da ibilgailu horien hondarrak jasotzea eta erretiratzea.
2. Baldin eta, Trafikoari, Ibilgailu Motordunen Zirkulazioari eta Bide Segurtasunari buruzko araudian ezarritakoaren arabera, ibilgailu bat abandonatuztat jotzen zirkunstantziak gertatzen badira, araudi horretan aurreikusitako neurriak hartuko dira, aldez aurretik bertan jasotako prozedurak beteta.
3. Abandonatuztat jotzetik salbuetsiak daude bere horretan egoteko agindu judizialen bat ezarria duten ibilgailuak, udalak horren berri badu. Udaleko agintaritzak eskatzen ahalko du hiriaren apaindurarako neurriak hartzeko.

VIII. KAPITULUA

ZARATAREN KONTRAKO NEURRIAK

33. artikulua. Hainbat jarduera.

1. Jendea bildu ohi den zona publikoetan (plazak, parkeak, etab.) edo eraikinen barrualdean zarata ateratzen bada, herritarren bizikidetzak eta besteenganako errespetuak eskatzen dituen mugen barruan mantendu beharko da.
2. Aurreko paragrafoan ezarritako agindua gauezko atsedeen-orduetan ateratako zaratei dagokie bereziki. Ondorio horietarako, gauezko atsedeen-ordutzat ezartzen dira egun bateko 22:00etatik hurrengo eguneko 8:00etara bitartekoak, salbu jaiegunetan eta asteburuetan (ondorio horietarako, ostiralak, larunbatak eta jai-bezperak), egun horietan gauezko ordutegia 23:00etan hasiko baita eta jaiegunetan ez baita amaituko 9:00ak arte.

Gauezko ordutegian, ebitatu egin beharko da pertsonen bizilekuko lasaitasuna eta intimitatea asaldatzen edo inbaditzen duten zaratak ateratzea. Alde horretatik, beharrezko neurriak hartu beharko dira arren-eta giza ahotsak, etxeko animaliek edo etxetresna elektrikoen, musikako aparatuen, klimitizazioen, aireztatzeko en eta abarren funtzionamenduak ateratako hotsa edo zarata etxebizitzetara transmiti ez dadin.

3. Kaleko zaraten ondorioetarako, gauezko atsedeen-ordutzat ezartzen dira egun bateko 22:00etatik hurrengo eguneko 8:00etara bitartekoak, salbu jaiegunetan eta asteburuetan (ondorio horietarako, ostiralak, larunbatak eta jai-bezperak), egun horietan gauezko ordutegia 24:00etan hasiko baita eta jaiegunetan ez baita amaituko 9:00ak arte.

Gauezko ordutegian, ebitatu egin beharko da pertsonen bizilekuko lasaitasuna eta intimitatea asaldatzen edo inbaditzen duten zaratak ateratzea.

34. artikulua. Betebeharrak.

1. Aurreko artikuluan zehazten diren zaratei dagokionez, gauezko atsedeen-orduetan, udalaren baimen berezia eta espezifikoa izan ezean, ezingo da:

— Garrasi egin edo builaka hitz egin.

— Bizilagunak gogaitaraz ditzakeen etxeko obrarik, lanik edo konponketarik egin. Jaiegunetan ere ezingo dira egin jarduera horiek.

— Eta, oro har, bizilagunen atsedena eragotz dezakeen zaratarik eta/edo dardararik transmititu.

2. Etxeko animaliak dauzkaten pertsonen nahitaez hartu beharko dituzte Animaliak Edukitzeko eta Babesteko Arauen Udalen Ordenantzan ezarritako neurriak, arren-eta animalien portaeratik bizilagunen lasaitasuna altera ez

dadin.

3. Bide publikoan eta jendea bildu ohi den espazio publikoetan ezin da musikako ekiporik edo instrumenturik erabili, propaganda egiteko, erreklamo gisa, abisatzeko, adia galarazteko xedea duen edozein hots-dispositibo baliatu edo zaratak eta/edo dardarak sortzen dituen beste edozein jarduerarik egin, salbu eta espresuki baimentzen denean edo ordena publikoa asaldatzen ez duten eta bizilagunak gogaitarazten ez dituzten kale-musikariak direnean.

35. artikulua. Auzokoen arteko salaketak.

1. Auzokoen arteko eragozpenak Jabetza Horizontaleko Legean daude juridikoki arautuak. Salaketarik gertatuz gero, Udalak bere esku dauzkan frogak eta neurketak ematen ahalko dizkie interesatuei.

36. artikulua. Zamalanak.

1. Bizitegi-zonetako bide publikoetan, salgaiak kargatzeko eta deskargatzeko lanak eta kaxak, kontainerrak, eraikuntzako materialak eta antzekoak maneiatzekoak 8etatik 22ak arte bakarrik egiten ahalko dira, non eta Udalak espresuki emandako baimenik ez dagoen, zeinak halaber, arrazoi justifikatuak tarteko, ordutegi murriztuagoak ezarzen ahalko baititu jarduera eta zona jakin batzuetan.

2. Salgaiak kargatzeko eta deskargatzeko lanetan ari den pertsonalak arreta berezia jarri beharko du inpaktu zuzenik ez sortzeko eta, era berean, ibilbidean zehar zama lekuz aldatzeak edo dardara egiteak sor dezakeen zarata ekiditeko.

3. Administrazioak beharresten ahalko du horrelako operazioek sorturiko eragozpenak ahalik eta gehien gutxitzeko behar eta egoki diren neurri zuzentzaileak hartzea, eta, zehazki, nahitaezkoa izango da gurpil pneumatikoak dauzkaten orgak edo eskorgak erabiltzea, beren ibilbidea egiten duten bitartean zarata leuntzeko.

37. artikulua. Bide publikoko lanak eta eraikuntzakoak.

1. Denbora jakin bat iraungo duten lanak, hala nola eraikuntzako eta konponketako obrak edo eraikinak botatze-koak, bai halaber bide publikoan egiten direnak, ezingo dira egin 22etatik 8ak arte eta jaiegunetan egun osoan, non eta Udalak espresuki emandako baimenik ez dagoen.

2. Behar diren neurri zuzentzaile egokiak hartuko dira, zaratak eta/edo dardarak auzokoengan sor ditzakeen eragozpenak ahalik eta gehien gutxitzeko.

3. Garbiketa publikoko eta zabor-bilketako lanak egiterakoan, herritarren lasaitasuna ahalik eta gutxien asaldatzeko behar diren neurriak hartuko dira. Gai horri dagokionez, udal-zerbitzu hori adjudikatzeko orduan, Udalak aintzat hartuko du kontratazioa hartu nahi duten enpresek erabiltzen dituzten ibilgailuen hots-emisioaren maila.

38. artikulua. Alarmak.

1. Alarma-sistema instalatua duen edo instalatzeko asmoa duen herritar eta enpresako edo komertzio arduradun oro behartuta daude alarmen zentral batekin konektatzera eta Eusko Jaurlaritzako Herrizaingo Sailak zehazten duen protokoloari jarraitzera.

2. Alarmako aparatuek edo emergentzia seinalizatzeak behar bezala homologatuta egon beharko dute, eta ezingo dira funtzionamenduan jarri, kausa justifikatuagatik izan ezean, betiere besteri kalterik egitea edo gogaikarritasunik sortzea eragotziz.

3. Kanpoko dispositiboek, hala nola abisagailu akustiko edo optikoen kutxek, kontakturako telefonoa eduki beharko dute, haren bidez erabakirik egokiena hartu ahal izateko, bai eta haren mantentzia egiten duen enpresaren izena eta telefono-zenbakia ere.

4. Baldin eta alarma-sistema baten funtzionamendu anormalak auzokoei eragozten badie eta haren arduraduna agertzen ez bada, edo aurreko pasarteetan ezarritakoa betetzen ez bada, pertsona arduradunarekin kontaktatzea eragotziz, aparatua desaktibatu egingo da, eta egintza horrek ez du inolako kalte-ordainik jasotzeko eskubiderik emango. Operazio horretan sorturiko kostuak instalazioaren titularra den pertsonari jasanaraziko zaizkio.

Alarma-sistema baten funtzionamendua anormala dela joko da baldin eta bere kabuz aktibatzen bada, hori justifikatzen duen inolako kausarik egon gabe.

5- Aurreko pasartean aurreikusitako neurriak ez du galaraziko dagokion santzioa ezartzea, baldin eta eragozpen horiek jabeari edota enpresa instalatzaileari edo hornitzaileari egotz dakizkiokeen ekintzen ondorio badira, sistemaren instalazio kaskarragatik edo kontserbazioko egoera onean mantentzeko beharrezkoak diren operazioak ez egiteagatik.

IX. KAPITULUA

SANTZIONATZEKO ERREGIMENA

39. artikulua. Arau-haustekak.

1. Arau-hauste administratiboa izango da Ordenantza honek zehazturiko xedapenak ez betetzea eta bertan zehazten diren debekuak urratzea.
2. Alkateak edo zeinengan hark delegatzen duenak santzionatuko ditu Ordenantza honetan xedaturikoaren urraketak. Betiere, legeriak baimentzen dituen mugen barnean eta kasu bakoitzean egon litezkeen erantzukizun zibil eta penalez gain.
3. Penalki edo administratiboki santzionatuak izan diren egitateei ezingo zaie beste santziorik jarri baldin eta subjektua, gertakaria eta funtsa santzionatutako berberak direla ikusten bada.
4. Baldin eta, dagokion prozedura santzionatzailea irekita, estimatzen bada gertakaria ez-zilegitasun penala ere izan daitekeela edo jakiten bada gertakari berarengatik zuzemen penalak bideratzen ari direla, Administrazioaren santzionatzeko ahalmena erregelatzen duen araudian kasu horietarako aurreikusitakoari lotuko zaio organo instrukzio-egilea bere jardunbidean.

40. artikulua. Arau-hauste motak.

1. Arau-haustekak arintzat, larritzat eta oso larritzat sailkatzen dira, kontuan hartuz ea nahita egin den, gizalegerik gabe jokatu den, zabarkeria maila, pertsonen osasunerako eta segurtasunerako arriskua, eragindako kaltearen larritasuna, arau-haustearen berrizkatura, eta arau-haustearen larritasuna ebaluatzean eragina duten gainerako zertzelada konkurrenteak.
2. Ondorio horietarako, arau-haustearen berrizkatura dagoela ulertuko da baldin eta arau-hauslea aurreko hamabi hilabeteetan kontzeptu berarengatik santzionatu bada behin edo gehiagotan.
3. Arau-hauste arintzat hartuko dira honako artikuluko hauei eginikoak:
 - a) 4. artikuluko 2a, 2b, 2c, 2d, 2f, 2g eta 2i atalak.
 - b) 5. artikulua.
 - c) 6. artikuluko 2a, 2b, 2c (salbu eta kalte larriak edo heriotza eragin badezakete), 2d, 2e, 2f, 2g, 2i eta 2j atalak.
 - d) 9, 10, 11, 12, 13, 14, 15, 16, 17, 18, 24, 28, 31, 33, 36, 37 y 38. artikulukoak.
 - e) Dominio publikoko ondasunetan kalteak eragitea, kalte horien zenbatekoa 3.000 eurotik gorakoa ez bada eta kaltea eragin duen egitea penalki tipifikatua ez badago.
 - f) Ez errespetatzea oinezkoentzako plazetan, espaloietan, parkeetan eta lorategietan matrikulatu gabeko bizikletan, ziklomotorrean eta motozikletan, patin motordunetan eta edozein tramankulu motordunetan zirkulatzeko debekua.
4. Arau-hauste larritzat hartuko dira honako artikuluko hauei eginikoak:

- a) 4. artikuluko 2e, 2h eta 2j atalak.
 - b) 6. artikuluko 2h. atala.
 - c) 7. artikuluko 2. atala.
 - d) 15. artikulua, baldin eta bide publikoaren erabiltzaileei arriskua dakarkien isurketarik gertatzen bada.
 - f) 19, 20, 21, 22, 23, 25, 26, 27, 29 eta 30. artikulua.
 - g) Dominio publikoko ondasunetan kalteak egitea, horien zenbatekoa 3.000 eurotik gorakoa bada baina 10.000 euro baino gehiagokoa ez bada, eta kaltea eragin duen egitatea penalki tipifikatua ez badago.
 - h) Ez obeditzea Agintaritzaren Agenteek emandako agindu bat, ordenantza honen zehaztapenak betetzeko eskakizunari loturik dagoena, betiere arau-hauste horrek izaera penalik ez badu.
 - i) Arau-hauste arin bat berriro egitea.
5. Arau-hauste oso larritzat hartuko dira ondoko hauek:

- a) Zuhaitz edo zuhaixketan kalte larriak edo heriotza eragin diezazkieketen ekintzak egitea (moztea, haustea, katalogaturiko edozein eratako substantzia arriskutsu isurtzea, etab.).
- b) Dominio publikoko ondasunetan kalteak egitea, horien zenbatekoa 10.000 eurotik gorakoa bada eta kaltea eragin duen egitatea penalki tipifikatua ez badago.
- c) Arau-hauste larri bat berriro egitea.

41. artikulua. Santzioak.

- 1. Arau-hauste arinak 30 eta 300 euro bitarteko isunekin santzionatuko dira.
- 2. Larriak direnak 301 eta 1.000 euro bitarteko isunekin santzionatuko dira.
- 3. Oso larriak direnak 1.001 eurotik 3.000 eurora arteko isunekin santzionatuko dira.

Zenbateko horiek aplikatzekoak izango dira, dagokien sektoreko araudiak ezar ditzakeen santzioez gain.

- 4. Ordenantza honen beste edozein arau ez betetzea, aurreko artikulua honi loturik ezarritakoaren arabera, 30 eta 300 euro bitarteko isunarekin santzionatuko da, santzio gisa zenbateko ekonomikoa bereziki zehaztua ez daukaten kasuetan.
- 5. Ezar litezkeen santzioak kontuan hartu gabe, egokiro ordaindu beharko dira dominio publikoko ondasunetan eragin diratekeen kalteak, bai eta kausatu diratekeen gastuak eta galerak ere, hori guztia dagozkien udal-zerbitzuek aurrez ebaluatu ondoren. Kalte, gastu eta galera horien zenbatekoa modu betearazlean zehaztuko du santzioa ezartzeko eskumena duen organoak.
- 6. Aurreikusitako santzioak ezartzea eta kalte, gastu eta galeren erreklamazioak egitea alde batera utzirik, organo eskudunak erretiratzeko ahaliko du jardueraren lizentzia, arau-haustea jarduera hori egikaritzean egin bada.

42. artikulua. Erantzuleak.

- 1. Baldin eta 14 urtetik beherako batek Ordenantza honetan agindurikoa betetzen ez badu, haren gurasoak, tutoreak, hartzaileak eta legezko edo egitatezko zainzaileak izango dira erantzuleak, hurrenkera horretan.
- 2. Gainerako kasuetan, ordenantza honetan ezarritakoa pertsonalki urratzen duena izango da erantzulea, bai eta ordenantza honetan zehazten diren beste pertsonak ere.

43. artikulua. Prozedura.

1. Egon litezkeen erantzukizunak mugatzeko eta dagozkien sartzioak definitzeko, Administrazio Publikoen Erregimen Juridikoaren eta Prozedura Administratibo Komunaren 30/1992 Legean eta hura garatzen duten gainerako arauetan aurreikusitako prozedurari jarraituko zaio.
2. Beste udal-organo batzuei egokitzen ahal litzaizkiekeen eskumenak alde batera utzirik, Agintaritzaren Agenteek, baldin eta Ordenantza honetan ezarritakoaren kontrako arau-hausteren bat egiten ikusten badute, arau-hausleei jokabide horretan atzera egiteko eskatuko diete, eta dagokien salaketa jarriko eta bideratuko dute. Ezezkoa emanez gero, edota arau-hausleak lokalizatzea ezinezkoa bada, Agintaritzaren Agenteek beharrezko baliabideak artikulatzen ahalko dituzte arau-hausteari amaiera emateko.
3. Arau orokor gisa, baldin eta arau-haustearen erantzuleek hala egiten ez badute, udal-zerbitzuek udal-ondasunak beren lehengo egoeran berrezartzera bideraturiko jarduketak egiteari ekingo diote, baina kostuak haiei ordainaraziko zaizkie.

AZKEN XEDAPENA

Ordenantza hau Gipuzkoako ALDIZKARI OFIZIALEAN argitaratu eta handik 15 egunera jarriko da indarrean, eta 4 urtez behin errebisatu egingo da.